

吾

學

編

皇明大政記第十卷

吾學編第十卷

臣海鹽鄭曉

丙寅武宗毅皇帝正德元年春正月都御史楊一清
總制陝西軍務○右都御史史琳卒○天鳴地震
○二月○三月隕星如月○夏四月少師兼太子
太師吏部尚書馬文升致仕焦芳爲吏部尚書○
林瀚爲南京兵部尚書參贊機務○五月彭澤爲
真定知府○王瓊爲副都御史總督鹽法○六月
辛酉震郊壇門太廟奉天殿○先師裔孫孔彥繩
爲世翰林五經博士○秋七月彗星見參井掃太

微垣○太白經天○八月立皇后夏氏○大角大
火動搖○九月兵部尚書劉大夏致仕許進爲兵
部尚書○王瓊爲戶部右侍郎○陝巴子拜牙即
嗣忠順王○冬十月霾霧四塞○太監劉瑾入司
禮監提督團營丘聚谷大用提督東西廠○瑾矯
詔殺太監王岳范亨徐智羅少師兼太子太師吏
部尚書華蓋殿大學士劉健少傅兼太子太傅禮
部尚書武英殿大學士謝遷吏部尚書焦芳兼文
淵閣大學士吏部左侍郎王鏊兼翰林學士並直
文淵閣許進爲吏部尚書○十一月欽天五官監

候楊源上疏杖闕下○戶部尚書韓文致仕顧佐
爲戶部尚書○左都御史張敷華致仕劉宇爲兵
部尚書○十二月進李東陽少師兼太子太師吏
部尚書華蓋殿大學士焦芳太子太保武英殿大
學士王鏊戶部尚書文淵閣大學士○謫武選主
事王守仁爲龍場驛丞○吏部侍郎兼翰林學士
張元禎卒○南京副都御史陳壽除名○是年潘
蕃爲南京刑部尚書右都御史熊繡總督兩廣軍
務兼巡撫

正德二年春正月戶部郎中李夢陽下錦衣獄

尋釋之○閏正月逮南京科道戴銳薄彥微等下

錦衣獄除名叅替機務南京兵部尚書林瀚落職

致仕○二月○三月乙亥朔日食○楊廷和劉忠

爲南京戶禮部左侍郎○南京國子祭酒章懋謝

病歸○劉瑾矯詔劾奸黨於朝堂○夏四月巡撫

江南右都御史艾璞下獄編管海南○五月楊廷

和劉忠爲南京戶禮部尚書副都御史雍泰提督

操江○六月○秋七月○八月今皇帝生於興邸

○總制陝西都御史楊一清致仕○杖欽天監五

官監候楊源於闕下尋卒○加焦芳王鏊並少傅

兼太子太傅謹身武英殿大學士吏部尚書許
進劉宇並太子太保○九月雍泰爲南京戶部尚
書尋致仕○冬十月楊珩和爲戶部尚書兼文淵
閣大學士直文淵閣○十一月革巡撫都御史兵備
憲臣○陶琰爲刑部侍郎○十二月劉忠爲南京
吏部尚書○王璽伏誅○是年復寧府護衛屯田
○右都御史熊繡回院陳金總督軍務兼巡撫○
戊辰正德三年春正月太子少保吏部尚書許進致
仕劉宇爲吏部尚書曹元兵部尚書屠滸吏部尚
書兼左都御史掌院事○王璉爲吏部右侍郎○

二月南京國子祭酒章懋致仕○三月賜呂楠等
進士及第出身有差○逮楊一清下獄尋釋之周
經爲禮部尚書尋致仕○夏四月南京國子司業
羅欽順除名○五月南京右都御史熊繡致仕○
六月劉瑾掌司禮監事逮京朝官下錦衣獄尋釋
之○太子太保吏部尚書致仕王恕卒○逮戶部
尚書韓文下錦衣獄尋釋之○秋七月○八月進
楊廷和少保兼太子太保○逮兵部尚書劉大夏
南京刑部尚書潘蕃下錦衣獄謫戍○九月○冬
十月四川盜起副都御史林俊巡撫四川兼贛理

軍務督兵討之○十一月禮部侍郎掌國子祭酒
事謝鐸致仕○十二月蔡清爲國子祭酒尋卒王
鴻儒爲國子祭酒○是年南京刑部尚書樊瑩卒
巳正德四年春正月總督漕運副都御史邵寶致
仕○二月○三月席書爲貴州提學副使○夏四
月王雲鳳爲國子祭酒○少傅兼太子太傅戶部
尚書武英殿大學士王鏊致仕○五月孝宗敬皇
帝實錄成○進焦芳少師兼太子太師華蓋殿大
學士降調翰林坊局諸臣有差○清理屯田○六
月石瑄爲南京國子祭酒○劉宇兼文淵閣○張

蘇爲吏部尚書○秋七月日本南海首遣人入貢
○八月遣茶莊王之國常德○九月畿內盜起竊
梟爲僉都御史督捕羣盜○閏九月奪平江伯陳
熊爵○冬十月虜寇寧夏殺總制尚書才寬○十
一月亦不剌阿爾禿廝掠西寧諸番○十二月
庚正德五年春正月總制軍務刑部尚書兼左都
御史洪鍾討四川群盜○禮部侍郎掌國子祭酒
事致仕謝鐸卒○二月進楊廷和吏部尚書武英
殿大學士曹元爲吏部尚書兼文淵閣大學士直
文淵閣○劉忠爲吏部尚書兼翰林院學士掌詹

事府事○三月太子太保禮部尚書致仕周經卒
○夏四月慶府安化王寘鐸反殺總兵官姜漢巡
撫都御史安惟學○四川巡撫都御史林俊屢敗
賊○五月焦芳致仕○平胡將軍涇陽伯神英提
督軍務右都御史楊一清總督軍務太監張永率
師討寘鐸○寧夏遊擊將軍仇鉞襲執寘鐸檻送
京師○六月京師旱霾○秋七月四川威茂地震
○四川賊破通江縣巡撫都御史林俊擊敗之○
八月寘鐸伏誅楊一清總制陝西軍務尋爲戶部
尚書○劉瑾楊玉伏誅張縉下獄死復劉大夏韓

文許進官致仕○李神英涇陽伯復陳熊平江伯
○革寧府護衛屯田○論平寘鐸功封仇鉞咸寧
伯張富秦安伯張容定安伯魏英鎮安伯馬山平
涼伯谷大珉永清伯朱德永壽伯○九月太子少
保南京吏部尚書梁儲爲吏部尚書吏部尚書兼
翰林學士掌詹事府事劉忠並爲文淵閣大學士
直文淵閣○改國子祭酒王雲鳳爲南京右通政
石琯爲國子祭酒王璿爲南京國子祭酒○羅玘
爲南京吏部侍郎○進楊廷和少傅兼太子太傅
謹身殿大學士劉忠少傅兼太子太傅梁儲少保

兼太子太保並武英殿大學士○總兵馬安敗賊於景州○陶琰爲副都御史總督漕運巡撫江北○冬十月羅欽順爲南京國子司業○致仕吏部尚書許進卒○掌詹事府事尚書學士白鉞卒○十一月章懋爲南京太常卿辭○傅珪爲吏部右侍郎○致仕禮部右侍郎掌國子祭酒事謝鐸卒○十二月尊太皇太后王氏爲慈聖康壽太皇太后皇太后張氏慈壽皇太后○劉機致仕○禮科給事中致仕賀欽卒

辛正德六年春正月楊一清爲吏部尚書孫交戸

部尚書喬宇南京禮部尚書○都御史林俊討江
津賊平之○二月邵竇爲戶部右侍郎總督倉儲
○三月築浙東捍海隄○夏四月江西盜起總制
軍務右都御史陳金提督軍務右都御史俞諫討
之○章懋爲南京禮部右侍郎辭○五月致仕太
子太保兵部尚書劉大夏卒○六月總制尚書洪
鍾巡撫四川林俊陝西藍璋合兵討四川賊○日
本遣我叛人宋素卿來貢○秋七月何鑑爲兵部
尚書○畿內賊趙燧反惠安伯總兵張偉提督軍
務副都御史馬中錫討之盜分掠山東河南○陳

壽爲南京刑部尚書尋致仕○逮張偉馬中錫下
錦衣獄八月南京禮部侍郎章懋致仕○加洪鍾
太子太保林俊右都御史藍璋右副都御史○九
月四川盜復起巡撫林俊及松番巡撫高崇熙討
平之○倭寇浙東○冬十月賊破冀州○棗強知
縣段勇擊賊死之伏羌伯總兵毛銳提督軍務兵
部侍郎陸完率兵討畿內賊巡撫山東都御史邊
憲真定都御史蕭翀下獄除名○許逵爲武定兵
備僉事○燕忠爲大理縣○十一月少傅兼太子
太傅吏部尚書武英殿大學士劉忠致仕○京師

地震○賊攻徐州掠淮西○十二月賊破裕州上
蔡西平同知郁采知縣霍恩王佐死之○提督軍
務副都御史彭澤率兵討河南群盜○費宏兼文
淵閣大學士直文淵閣○加楊一清少保兼太子
太保○傅珪爲禮部尚書尋致仕蔣冕爲吏部右
侍郎○孫需爲工部尚書○楊廉爲順天府
尹○是年鎮遠侯顧仕隆總兵提督漕運鎮守淮
安

壬申正德七年春正月毛銳遇賊於真定敗績○少
師兼太子太師吏部尚書馬文升卒○南昌知府

李承勳擊破華林賊○賊掠襄陽○二月賊破泌陽○賊攻河南總兵馮禎戰歿○三月彭澤遣兵擊賊於西平大破之○夏四月賊轉掠畿內○五月劉宇卒○江夏人擒趙燧○閏五月賊走鎮江官軍禦之敗績○陳琳爲山東提學副使○賊殺湖廣巡撫馬炳然○六月王瓊爲戶部右侍郎兼僉都御史○秋七月僉都御史王雲鳳巡撫宣府○八月賊至狼山颶風大作官軍勦平之趙燧伏誅○九月屠瀟卒○封谷大寬爲高平伯陸永鎮江伯仇鉞進封咸寧侯都御史陸完加太子少保

掌院事○冬十月京畿山東河南江西群盜平進
楊廷和少師兼太子太師華蓋殿大學士梁儲少
傅兼太子太傅謹身殿大學士費宏太子太保武
英殿大學士○召邊將江彬等兵入京師○十一
月總制都御史陳金討平江西群盜洪鍾罷右都
御史彭澤總制四川軍務○王鴻儒爲南京戶部
右侍郎○王守仁爲南京太僕少卿○十二月虜
亦不剌殺阿爾倫可汗走西海虜中立阿不孩爲
可汗○李東陽致仕○是年楊旦爲南京禮部侍

郎

癸酉正德八年春正月儲瓘爲南京吏部侍郎尋卒
○二月真帖木兒還土魯番○三月○夏四月副
都御史陳壽巡撫陝西○五月虜寇大同○六月
王瓊爲戶部尚書○姚源賊平○秋七月席書爲
浙江按察使○八月石瑄爲南京吏部侍郎○虜
寇宣府○拜牙即棄哈密走降土魯番滿速兒遣
人據哈密○九月王瓊爲國子祭酒○冬十月都
督朱寧掌錦衣衛事○十一月○十二月河南右
布政使楊子器卒○贈誠意伯劉基太師

甲戌正德九年春正月軋清宮災○總制都御史彭

澤討平四川群盜○二月帝始微行○王守仁爲
南京鴻臚卿○靳貴爲文淵閣大學士直文淵閣
○三月加彭澤太子太保左都御史時源左都督
○夏四月復寧府護衛屯田○五月太子太保禮
部尚書武英殿大學士費宏罷○六月孫需喬宇
爲南京吏禮部尚書○秋七月虜寇大同宣府○
八月辛卯朔日食○左都御史彭澤總督甘肅軍
務經略哈密○江西右布政使鄭岳除名○九月
降翰林編修王思爲嶺南驛丞○冬十月○十一
月○十二月南京戶部尚書致仕雍泰卒○是年

副都御史陶琰總督漕運兼巡撫江北

正德十年春正月○二月楊庶爲南京禮部侍郎○三月楊廷和憂去○夏四月土魯番歸哈密大掠嘉峪諸夷○閏四月楊一清兼武英殿大學士直文淵閣○陸完爲吏部尚書王璉兵部尚書○右都御史彭澤掌院事○兀良哈寇馬蘭谷參將陳乾戰死○五月石珪爲禮部右侍郎羅欽順楊廉南京吏禮部右侍郎○六月提督軍務兵部侍郎陳玉副總兵都督汪勇帥師討兀良哈○秋七月浙江左布政使方良永致仕○八月毛紀爲

禮部尚書○虜寇固原平鞏○僉都御史王雲鳳
清理兩浙鹽法尋致仕○九月虜寇固原平鞏○
冬十月孫燧為副都御史巡撫江西江西按察副
使胡世寧下錦衣獄謫戊○十一月○十二月癸
丑朔日食○是年參政吳廷舉兼副使撫治庶鞏
諸府○右都御史陳金總督兩廣軍務兼巡撫○
王鴻儒為吏部侍郎

丙正德十一年春正月王守仁為僉都御史巡撫
南贛汀漳○二月虜寇榆林○三月○夏四月安
南陳嵩弒其主黎暘○五月風霾大旱○六月加

王瓊太子太保○虜寇大同提督軍務兵部右侍郎丁鳳總兵都督劉暉帥師禦邾之○秋七月李東陽卒加梁儲少師兼太子太師華蓋殿大學士○虜寇宣府○八月楊一清致仕○掌詹事府事禮部尚書蔣冕兼文淵閣大學士直文淵閣○九月土魯番復據哈密侵肅州守將芮寧禦之敗歿○冬十月兵備副使陳九疇敗土魯番於肅州○虜掠白羊口○十一月黃珂爲南京工部尚書○十二月監察御史孝廉陳茂烈卒

丁丑正德十二年春正月帝獵於南海子○二月○

三月加王瓊少保○賜禮部貢士舒芬等進士及第出身有差○夏四月靳貴致仕○五月禮部尚書毛紀兼東閣大學士直文淵閣○四川賊平馬昊爲右都御史○六月己巳朔日食○毛澄爲禮部尚書王鴻儒廖紀吏部左右侍郎顏頤壽副都御史○秋七月加蔣冕太子太傅武英殿大學士毛紀太子太保文淵閣大學士○加王守仁提督軍務仍巡撫○許達爲江西按察副使○八月帝幸昌平至居庸關監察御史張欽閉關三上疏○帝即日回鑾○湖廣僉副都御史吳廷舉賑卹之

○貴州巡撫都御史秦金鄒文盛合兵討清平苗賊○九月帝幸大同獵陽和雨雹星隕○虜犯和陽掠應州○冬十月都御史王守仁平橫水賊○十一月都御史王守仁平桶岡賊○少師兼太子太師吏部尚書華蓋殿大學士楊廷和仍直文淵閣○加王瓊少傅兼太子太傅○十二月王廷相爲四川提學僉事○閏十二月封江彬平虜伯許泰安邊伯○湖廣巡撫都御史秦金討平榔桂賊
戊寅正德十三年春正月丙午帝還京○都御史王守仁平泃頭賊○二月慈聖康壽太皇太后王氏

崩○帝復出居庸關○三月帝還京○左都御史彭澤按察副使陳九疇除名○夏四月帝至昌平謁六陵遂獵于密雲○五月己亥朔日食○帝還京○六月江西大水○秋七月帝出居庸關歷宣府至大同○虜寇固原掠蘭靖臨鞏○八月帝在大同○九月帝在大同○冬十月帝渡河幸榆林○十一月帝在榆林○十二月帝在榆林○是年僉都御史張潤巡撫順天○右都御史楊旦總督兩廣軍務兼巡撫

已卯正德十四年春正月帝在榆林○二月帝還京

○乙酉帝自稱總督軍務武大將軍太師鎮國
公更名壽巡兩直隸山東江西南湖廣○三月兵部
郎中黃鞏等伏闕疏諫南巡下錦衣獄杖闕下謫
戊除名降調有差○京師風霾晝晦水溢○金吾
指揮張英肉袒疏諫死之○王鴻儒爲南京戶部
尚書○夏四月羅欽順爲吏部右侍郎○五月太
監賴義駙馬都尉崔元都御史顏頤壽戒飭寧王
宸濠○加王瓊少師兼太子太師○劉瑞爲浙江
提學副使○六月丙子宸濠反巡撫副都御史孫
燧按察副使許達死之○宸濠攻陷南康九江知

府陳霖江穎棄城走○睿宗獻皇帝崩○秋七月
宸濠攻安慶守備都指揮楊銳知府張文錦指揮
崔文德却之○逮司禮太監蕭敬吏部尚書陸完
錦衣都督朱寧下錦衣獄尋釋敬○提督南贛軍
務副都御史王守仁及吉安知府伍文定起兵討
宸濠復南昌宸濠至鄱陽湖守仁督兵逆戰敗之
丁巳擒宸濠○致仕南京吏部右侍郎羅玘卒○
八月癸未帝討宸濠輔臣梁儲蔣冕邊將江彬許
泰扈行○九月帝至南京○王守仁巡撫江西伍
文定爲江西按察使○南京兵部尚書林瀚卒○

冬十月帝在南京○十一月帝在南京○十二月
帝在南京○是年鄧璋爲南京戶部尚書

庚辰正德十五年春正月帝在南京○彗星見○二
月○三月癸丑朔日食○夏四月○五月江西大
水○六月○秋七月○八月瓦剌掠土魯番○閏
八月帝至鎮江○九月○冬十月帝班師還京○
王瓊爲吏部尚書○十一月○十二月帝至通州
○宸濠伏誅○胡世寧爲湖廣按察使改僉都御
史巡撫四川

辛巳正德十六年春正月帝還京加蔣冕毛紀少傅

少保戶部尚書謹身武英殿大學士○費宏少保
戶部尚書仍直文淵閣○石珪爲禮部尚書兼翰
林學士掌詹事府事羅欽順爲吏部左侍郎○二
月浚白茅河○三月丙寅帝崩於豹房

皇明大政記第十卷終

子履準校正

建文遜國記敘

嘗觀詩書所載家國興亡必有其自蓋天人相符非幸與不幸適然致也三代而下一統繼世惟秦隋自速敗秦之暴橫隋之奢淫亡非天也讀遜國記竊怪建文君無一於此何以遽亡

高皇帝再造乾坤功德光三代陵土未乾材臣宿將猶存邊隅無故宴然啓甲成康之舊

文皇南來忽於破竹何也人咸咎方蓄謀國之疎或曰漢文天授少帝雖輔以伊姜亦胡能存然歟夫天與子後嫡長未有善繼者湯傳孫文王舍伯

邑考扶蘇終上谷漢惠無嗣隋殺楊勇唐宗由秦
王宋至孝宗始嗣太祖

文皇亦然天之定命自古識之矣建文君臣何尤
乎居升之疏禍迫於鼂錯信乎天也天有所興孰
能無廢翁故考之編年參之野史為遜國記以備
遺缺傳曰鑒於后羿而用德度經曰勤用明德庶
邦不享作者意也時

嘉靖丙寅春中既望進士

臣

鄭履淳謹敘

建文遜國記

吾學編第十一

海鹽鄭曉

建文皇帝諱允炆 太祖之孫懿文太子之子也
洪武十年十一月己卯生六年而其兄雄英卒
又十年而懿文卒 高祖年六十有五矣御東角
門對群臣泣翰林學士劉三吾進曰皇孫世適富
於春秋正位儲極四海繫心 皇上無過憂 高
皇曰善是年九月庚寅立爲皇太孫詔曰曩者列
聖相繼馭宇者首建儲君朕甲辰即王位戊申即
帝位於今二十五年矣前者選將練兵奠生民於

田野統一以來除奸貪去豪強用心多矣邇來蒼
顏皓首儲嗣爲重九月十三日冊適孫允炆爲皇
太孫奉上下神祇以安黎庶太孫英明仁厚好文
章典禮旣爲太孫中外萬幾時付裁決當是時政
治嚴覈太孫濟以寬大中外欣欣愛戴以宋國公
勝穎國公友德兼太子太師曹國公景隆涼國公
玉太子太傅開國公昇全寧侯恪太子太保詹徽
太子少傅兼吏部尚書茹瑺太子少保兵部尚書
任亨太少詹事兼翰林修撰杜澤楚樟詹事丞徽
等以下支兼官俸又以兵部尚書致仕唐鐸刑部

尚書楊靖兼太子賓客又命廷臣舉孝義篤行之
士鄭濟王勲爲左右庶子二十九年八月詔更議
諸王見東宮禮禮官曰諸王來朝冕服見天子畢
次見東宮已有定議其敘家人禮王及東宮俱常
服引禮官請王由文華殿東門入至後殿王西向
東宮東向贊禮官贊四拜王坐受相見禮畢叙坐
則東宮正中南向諸王列于東西奏上從之三十
一年閏五月乙酉遺詔曰朕受皇天之命膺大任
於世定禍亂而偃兵安生民於市野謹撫馭以膺
天命三十有一年憂危積心日勤不怠專志有益

於民柰何起自寒微無古人之博智好善惡惡不
及多矣今年七十有一筋力衰微朝夕危懼慮恐
不終今得萬物自然之理其奚哀念之有皇太孫
炆文仁明孝友天下歸心宜登大位以勤民政中
外文武臣僚同心輔佐以福吾民祭祭之儀一如
漢文帝勿異布告天下使知朕意孝陵山川因其
故無改諸王臨國中無得至京王國所在文武吏
士聽朝廷節制惟護衛官軍聽王諸不在令中者
推此令從事丙戌令禮部議喪禮辛卯皇太孫即
皇帝位詔曰天降下民作之君我皇太祖高皇帝

受天明命統有萬邦宵衣旰食弘濟斯民凡事有
益于天下者無所不用其心政教休明規模宏遠
朕以眇躬纂承大統恭依遺詔於洪武三十一年
閏五月十六日即皇帝位夙夜祗懼思所以克相
上帝寵綏四方以無忝我皇祖之大命永維寬
猛之宜誕布維新之政其以明年爲建文元年大
赦天下於戲德惟善政政在養民當遵先聖之言
期致雍熙之盛百辟卿士體朕至懷是日塋孝陵
丙申詔內外五品以上文官及縣令薦賢才定
保舉連坐法是月上皇祖考大行皇帝謚曰高

皇帝廟號太祖 皇祖妣孝慈皇后曰高皇后尊
母皇太子妃呂氏爲皇太后議革冗員以中書舍
人蹇義爲吏部右侍郎戶部主事夏原吉爲本部
右侍郎兵部尚書齊太常寺卿黃子澄預祭國
事以平江知縣陳彥回爲徽州府知府秋七月召
漢中府學教授方孝孺爲翰林侍講召董倫爲禮
部左侍郎兼翰林學士命曹國公景隆即訊周王
逮至京廢爲庶人以王紳爲國子祭酒以張鳳李
衡趙福張弼汪濱孫端王斌楊忠林良李成張敏
劉政爲錦衣衛世一百戶有差鳳等皆西宮殉葬

宮人父兄所謂朝天女戶也八月進魏國公輝祖
曹國公景隆祿秩勅輝祖練兵山東召王景彰爲
禮部右侍郎兼翰林侍講尋陞學士以雲南左布
政使張統爲吏部尚書徵江西處士楊士奇克實
錄編纂官尋授齊府審理副仍留翰林編纂罷禮
部尚書鄭沂以雲南布政使陳迪爲禮部尚書以
臨江府推官劉翼爲知府以劉儁盧淵爲兵部左
右侍郎以何福爲征虜將軍總兵征百夷都督徐
凱副之九月罷築銅鼓衛城召輝祖還京安陸侯
吳傑亦召還京長星西隕有聲如雷雲南總兵官

征虜前將軍西平侯沐春卒以馬京爲大理卿冬
十月何福進兵金齒討諸蠻尋平之以戴元禮爲
太醫院使召北平總兵都督楊文還京十一月征
南將軍總兵都督僉事顧成征五開還兵常德命
錦衣指揮談全諭成班師賞勞成及其副將何清
宋晟韓觀有差十二月朔帝省牲郊壇是歲監察
御史解縉來奔喪謫河州衛吏以工部侍郎張昂
掌北平布政司事謝貴爲北平都指揮使王鈍爲
戶部尚書召鄭賜於安東起徒中爲工部尚書起
流人劉有年爲太平知府以曾鳳韶爲監察御史

以右都督沐晟嗣西平侯總兵鎮守雲南召宋濂
孫懌還京以爲翰林侍書罷北平山東河南山西
陝西五省及淮安徐州學校貢士以國子學錄張
智爲司業皇子學訓導鄒緝爲助教召韓宜可爲
副都御史何福以平蠻功陞右府都督同知以燕
府訓導康汝楫爲安岳知縣詔求直言舉山林巖
穴懷材抱德之士監察御史尹昌隆上書請勤政
帝嘉納曰朕過也詔禮部頒天下使明知朕過調
僉都御史劉觀爲嘉興知府盡釋刺面軍及徒人

還鄉里

巴建文元年

華陰縣洪武三十二年

春正月庚辰大祀天地

於南郊始奉

太祖高皇帝配先是戊寅上御奉

天殿誓戒百官是夕遂宿於文華殿齋宮巳卯出

舍皇邸尚膳進素食庚辰子夜行事帝脫烏登大

祀殿秉圭奠瓚興俯拜跪如禮昧爽還宮御奉天

殿受群臣賀方孝孺進郊祀頌詔養老賜高年米

絮帛有差命官贖民粥子減田租遣使告即位于

天下神祇何福班師還京勅修太祖高皇帝實

錄禮部左侍郎兼翰林學士董倫右侍郎兼翰林

學士王景彰爲總裁官太常少卿廖昇翰林侍講

學士高巽志副總裁翰林修撰李貫國子博士王
紳漢中府學教授胡子昭齊府審理副楊士奇崇
仁縣學訓導羅恢馬龍他郎甸長官司吏日程本
立等爲纂修官二月都督韓觀練兵於德州詔尊
考妣爲皇帝后祔享宗廟立妃馬氏爲皇后封弟
允熲允燧允爌爲王詔曰朕惟有盛德而不享其
報者必垂慶于後昆履大位而不逮乎親者必致
尊于宗廟此天下之至理古今之通義也昔我
太祖高皇帝平定天下承千載之大統 皇考懿
文皇太子蚤登儲位參決萬機默施寬仁陰贊至

治視民如子錫祐朕躬 太祖奄棄臣民肆朕嗣
登大位既謚 太祖爲高皇帝 孝慈皇后爲高
皇后而 皇考謚號未稱心切悼焉邇者採群臣
之言追尊皇考爲孝康皇帝廟號興宗皇妣懿敬
皇太子妃爲孝康皇后擇日祔廟群臣復謂中宮
之號未正無與共承祭祀諸弟之封未定無以夾
輔邦家繼以爲請已冊妃馬氏爲皇后封弟允熲
爲吳王允燧爲衡王允燾爲徐王夫尊親所以崇
孝敬之道正家所以厚風俗之源嘉與萬方同臻
至治宗祖廟謚稱號所以褒顯功德非所當諱今

後惟廟諱如律迴避廟謚稱號勿諱民間及山林
岩穴有懷才抱德練達政治廉能幹濟之士有司
明著實跡禮請來京授以祿位共安黎庶軍民男
婦有八十九十者賜米一石肉十斤酒三斗九十
者加賜帛一疋綿一斤若身犯杖以上隸卒倡優
不與所在鰥寡孤獨貧無產不能自存者有司歲
給米三石令親戚收養無親戚里隣養之母令失
所其有田地荒蕪無人耕種者除其徭賦農桑衣
食之本有司勿奪民時使得盡力足其衣食學校
風化之源教養英俊以備任用有司宜加意勸勉

禁其習於浮靡務得真材以輔至治民之休戚係
守令賢否官之清濁在考覈公平在內監察御史
在外布政按察司宜公考察果政蹟異常及關其
不才奏聞黜陟軍民義夫節婦孝子順孫及同居
共爨五世以上鄉黨稱其孝義者有司勘聞旌表
軍民凡有嫁娶喪葬窮窘不能自舉者部伍鄰里
宗族相資助勿使失所水旱災傷速開報踏勘賑
濟軍中孤兒給糧存恤有定例其篤廢殘疾無人
侍養及年老有丁代役者管軍官宜加撫恤願還
鄉者聽民間有篤廢殘疾不能自存者收養濟院

例支衣糧使遂其生前代兵後骸骨暴露尚多當
掩骼埋胔之時所在軍民官司即便收瘞衛所勾
軍有司照名發與果戶絕即與除伍進封江都郡
主爲公主以儀賓耿璿爲駙馬都尉都督僉事宋
晟總兵鎮守甘肅以周是修爲衡府紀善更定官
制陞六部尚書正一品設左右侍中各一人位侍
郎上改戶部四司爲民度支金帛倉庾刑部四司
爲詳憲比議職門都官六部司去清吏字罷左右
都御史設都御史一人副僉都御史各一人改通政
司爲寺通政使爲通政卿通政叅議爲少卿寺丞

增置左右補缺左右拾遺各一人復置大理寺改
爲司卿爲大理卿左右寺止爲都評事寺副爲副
都評事司務爲都典簿改太常寺卿爲太常卿少
卿寺丞分左右又改天壇祠祭署爲南郊祠祭署
泗州祠祭署爲泗濱祠祭署宿州祠祭署爲新豐
祠祭署又增鍾山祠祭署及司圃所改光祿寺卿
爲光祿卿少卿寺丞分左右而陞少卿從四品省
署丞二人增監事二人改太僕寺卿爲太僕卿增
典廐典牧二署設騎驥十五群遂生三群分隸二
署增少卿寺丞各一人詹事府增少卿寺丞各一

人賓客二人又置資德院設資德一人資善二人
其屬贊讀贊書著作郎各二人掌籍典簿各一人
增司業二人省博士學正學錄增助教十七人改
鴻臚寺卿爲鴻臚卿分少卿寺丞爲左右翰林院
增承旨一人學士一人文學博士二人省侍講侍
讀學士置文翰文史二館文翰館設侍書而改中
書舍人爲侍書文史館設修撰編修檢討改謹身
殿爲正心殿設學士一人改殿閣坊大學士爲學
士文淵閣設典籍二人革六科左右給事中改五
城兵馬指揮司爲五城兵馬司指揮副指揮爲兵

馬副兵馬革左右布政使設布政使一人布政司
堂上官各陞一級改按察司爲十三道肅政按察
司改廣東鹽課司爲都轉運鹽使司革五軍斷事
官及稽仁稽義稽禮稽智稽信五司官增親王官
賓輔二人正三品伴講伴讀伴書各一人長史一
人左右長史各一人審理正典膳正奉祠正良醫
正典寶正並去正字審理副等改爲副審理等郡
王賓友二人正四品教授一人記室二人直史一
人左右直史各一人吏目一人典印典祠典禮三
署典印典祠典禮各一人典饌典藥二署典饌典

藥各二人典禮署引禮舍人二人儀仗司吏目一人宿輔三伴賓友教授進對侍坐稱名不稱臣見禮如宿師址平按察副使張璉坐藩府事謫典史址平右布政使曹顯坐罪削籍是月 王來朝行皇道入登陛不拜監察御史曾鳳詔劾王不敬戶部侍郎卓敬上書論劾皆不報免民賃舍錢革松番衛三月丁亥帝祀先師於太學盥獻拜跪禮如廟社御彞倫堂見師生賞幣鈔有差以散騎常侍張成等七十一人爲海上巡檢勅布按二司官糾察屬吏革畧陽縣是月 成祖還國燕世子及其

弟高煦高燧留京師未幾遣還北平俄北平按察
僉事湯宗上變告言按察使陳瑛密受燕府金錢
有異謀遠瑛安置廣西燕山左護衛百戶倪諒亦
上變告逮府中官旗手諒周鐸等伏誅遂勅都督
宋忠率兵三萬及燕府護衛健卒屯開平名備胡
都督徐凱練兵臨清都督耿獻練兵山海關召燕
府胡騎指揮關童等還京調北平永清兩衛官軍
屯彰德順德戶部右侍郎夏原吉給事中徐思勉
等二十四人克採訪使巡行天下問民疾苦興廉
黜貪得便宜行事京師地震監察御史尹昌隆上

疏斥爲福寧知縣夏四月革南丹衛附慶遠召湘
王栢於荊州栢自焚卒齊府人曾名深上變告召
齊王搏至廢爲庶人留京師誅其護衛指揮柴真
等未幾幽代王桂於大同繫岷王榭於雲南並廢
爲庶人當是時 成祖威名最盛於諸王最長地
勢形便兵力又最强朝廷深疑之齊恭黃子澄徐
輝祖侍郎卓敬日夜謀所以防燕者會燕長史葛
誠教授余逢辰亦稍洩其謀張昺謝貴馬宣彭二
每遇中朝使者至北平亦頗傳語言謂宜早爲備
成祖固知之自京師歸即托疾久之遂稱病篤大

暑圍火爐搖顛曰寒甚寒甚宮中亦杖而行朝廷
稍不爲意誠逢辰密告昌貴曰殿下本無恙公等
勿解防恐一旦不可測已而三都督密謀益急五
月選補儒學官先是學官缺用舉人及中試監生
通經儒士至是詔天下凡在任未入流官及坐法
謫戍已更者但通經薦試俄又詔衛官舉通經軍
士聽布按二司試上吏部銓用岳池教諭程濟上
書言有大難起宗室中下獄省連山縣入連州以
戴德彝爲左拾遺宋徵宗人府經歷錢芹戶部司
務王叔英翰林修撰六月省興濟縣入青縣置千

戶所於戎縣以開平王甥趙諒爲留守左衛指揮
僉事是月召解縉于河州以爲翰林待詔秋七月
甲戌 成祖兵起號靖難北平掌布政司事侍郎
張昺都指揮使謝貴彭二燕府長史葛誠教授余
逢辰死之遂奪省城九門都指揮使俞瑱走居庸
關馬宣走薊州宋忠率師至居庸關退保懷來留
瑱守關 成祖上書言 皇考太祖高皇帝艱難
百戰萬死一生定天下成帝業傳之萬世封建諸
子鞏固宗社爲磐石安不幸 皇考賓天陛下嗣
承大寶而姦臣齊恭黃子澄輩包蓄禍心恣讒奮

毒假陛下之威權剪皇家之支葉楠櫟栢桂梗五
第不數年間並見削奪雖有愆過未聞不軌輒削
王爵奪王土轉徙流離行路矜惻栢尤可憫闔室
自焚聖仁在上胡寧忍此蓋非出陛下之心皆姦
臣所爲也心尚未足又以加臣臣守藩于燕二十
餘年寅畏小心奉法循分陛下嗣統以來臣事若
之誠明於皎日誠以君臣大分骨肉至親恒思加
慎爲諸王先而姦臣跋扈蔽陛下之聰明誣直爲
枉加禍無辜執臣奏事人箠楚刺焚備極苦毒迫
言臣謀不軌遂分布宋忠謝貴張昺等於北平城

內外甲馬馳突於街衢鉦鼓喧鞞於遠邇圍守
府周匝嚴密小大凜凜如臨湯火已而護衛人執
貴冑始詢知奸臣欺詐之謀號地呼天擗踊無訴
竊念臣於懿文皇太子同父母兄弟也今事陛下
如事天也權姦之心不止害臣譬伐大樹先剪
附枝親藩夷滅朝廷孤立姦臣得志社稷危矣伏
望陛下廓日月之明奮雷霆之斷渙發德音去此
兇慝以肅清朝廷以永安宗社以保全親藩遙仰
天門敬摭愚懇惟陛下念之臣又竊計姦權之黨
必已蟠結深固恐陛下未易除之伏覩祖訓有

云如朝無正臣內有姦惡則親王訓兵待命天子
密詔諸王統領鎮兵討平之臣謹俯伏俟命惟陛
下念之念之甲戌通州衛指揮房勝以城降燕丙
子北平都指揮使馬宣起兵薊州不克死之毛指
揮遂以薊州降燕遵化衛指揮蔣玉密雲衛指揮
鄭亨又各以其城降燕己卯瑱師潰於居庸退依
忠於懷來甲申 成祖攻懷來忠敗績及瑱被獲
都指揮彭聚孫泰戰死都指揮莊得敗走丙戌永
平指揮趙彝郭亮以城降燕庚寅大寧總兵劉貞
都督陳亨都指揮卜萬引大寧兵號十萬出松亭

關駐沙河進攻遵化壬辰 成祖援遵化貞等退
保松亭關亨陰輸款於燕忌萬不敢發 成祖間
萬貞亨縛萬下獄聞於朝籍萬家是月以長興侯
耿炳文爲征虜大將軍駙馬都尉李堅都督審忠
爲左右副將軍帥師北進詔天下曰朕奉 高皇
帝遺詔纂承大統宵衣旰食思圖善以安民豈意
國家不幸骨肉之親夔謀僭逆去年周庶人櫛潛
爲不軌辭連燕齊湘三王朕以親親之故不忍暴
其過止正櫛罪餘皆不問今年齊王榑謀逆事覺
推問犯者又言與湘王栢某王某同謀大逆栢自

知罪惡難逃先已自焚死樽已廢為庶人朕以某
王於親最近未忍究其事今乃稱兵犯闕不得已
遣長興侯耿炳文等率兵三十六萬往討其罪咨
爾中外臣民軍士各宜懷忠守義與國同心永安
至治祭告天地宗廟禮部書諭諸王削燕屬籍時
帝方銳意文治日與孝孺等討論周官法度以為
北兵不足憂黃子澄謂北兵素強且無有營剗之
旅不早禦之恐河北遂失又請命安陸侯吳傑江
陰侯吳高都督都指揮盛庸潘忠楊松顧成徐凱
李文陳睢平安等各率偏師步騎號百萬數道並

進期直搗北平檄山東河南山西三省合給軍餉
省礮嘉臨西睢寧三縣和曲祿勸二州勅令京朝
官請告歸省給勘合內府以京口驛隸京師睢陳
歸德三州直隸河南布政司徵謫戍指揮僉事伏
願等入京復其官置平燕布政使司于真定刑部
尚書暴昭掌布政司事贈故翰林待制王禕爲翰
林學士謚文節徵雲南兵入京備征八月炳文兵
三十萬至真定都督徐凱兵十萬駐河間都督潘
忠楊松先鋒駐鄭州壬子中秋夕 成祖率衆渡
白溝河圍雄縣破其城盡殺守陴卒屠其民潘忠

楊松兵渡月樣橋接戰遇伏大敗被執 成祖遂
進至鄭州奪戰馬輜重炳文部將張保降燕言炳
文兵三十萬先至者十三萬分營滹沱河南北
成祖厚撫保遣歸詐言兵敗被執幸守者困得脫
竊馬歸又令言雄鄭敗狀燕兵旦夕且至令河南
兵北移得併力破之易炳文聞保言果移南營過
河壬戌 成祖至真定炳文出城逆戰敗績兩副
將軍李堅審忠及都督顧成河托都指揮劉燧皆
被執成降燕丙寅 成祖攻真定不克還北平是
月以曹國公景隆爲征虜大將軍馳至軍中會諸

將北進帝聞炳文敗績始有憂色謂子澄曰柰何
子澄對曰勝敗兵家常事無足慮今天下全盛士
馬精強兵甲堅利糧餉充足區區一隅豈足當天
下之力調兵五十萬四面攻之衆寡不敵必成擒
矣曰孰堪將者子澄曰景隆可以當之前不用炳
文而用景隆豈有此失遂遣景隆代炳文谷王穗
自宣府還京齊泰等慮遼王植寧王權通疏召二
王還京遼王至寧王不至詔削權護衛監察御史
韓郁上書乞罷北征兵不聽九月江陰侯吳高都
楮揮耿獻楊文帥遼東兵圍永平大將軍景隆乘

傳至德州山東叅政鐵鉉調兵食景隆合兵五十萬進管河間 成祖率衆援永平高等退保山海關安陸侯吳傑兵潰於真定傑遁還京謫爲南寧衛指揮使冬十月 成祖出劉家口襲破大寧都指揮朱鑑死之都指揮房寬寧王權皆降燕劉貞陳亨自松亭關引兵來援亨及營州中護衛指揮徐理陳文襲貞破其營貞遁廣寧浮海還京景隆聞 成祖攻大寧引兵渡蘆溝橋攻北平築壘九門景隆攻麗正門幾破城中婦女並乘城擲瓦石景隆令不嚴驟退北平守益堅景隆別將攻通州

敗績甲寅 成祖盡拔大寧諸軍及兀良哈三衛
胡騎挾寧王入松亭關趣接北平十一月庚午景
隆移營白河西先鋒都督陳暉渡河而東遇 成
祖戰敗績景隆七營兵合戰皆潰景隆盡棄其輜
重拔其衆南奔駐德州癸酉九門兵皆潰乙亥
成祖再上書言臣叨奉宗藩見惡權姦橫加大惡
上書自陳今歷三月未蒙垂察疊發大兵討罪不
已竊聞朝廷論臣有不軌之事八謹陳其詳惟陛
下垂察其一謂臣護衛踰額 祖訓職掌條王府
官軍不拘數目各王府皆然此姦臣枉臣一也其

二謂臣不當無事操練軍馬 祖訓兵衛條王教

練軍士遍數不拘此姦臣枉臣二也其三謂臣不
當於各衛選用官軍 祖訓 職條王府武官干

戶百戶從王於所部軍職內選用開奏直詣御前
頒降誥勅此姦臣枉臣三也其四謂臣私養韃靼
健卒本洪武中歸附處於北平 皇考命於護衛

歲給衣糧備虜此姦臣枉臣四也其五謂臣招致
各處異人術士養於府中朝夕論議爲非竟無主
名此姦臣枉臣五也其六謂臣府中守禦四門不
當僭擬皇城守禦之制更番甚嚴 祖訓兵衛條

凡王府守禦宿衛護衛均審此姦臣枉臣六也其
七謂臣宮至僭侈此皇考所賜祖訓營繕條
燕因元之舊非臣僭越此姦臣枉臣七也其八謂
臣第二子高煦過涿州擅答驛官此臣失教然答
一驛官遂指爲臣不軌之迹寃濫已甚何以服天
下後世此姦臣枉臣八也且陛下與臣皆出太
祖高皇帝孝慈高皇后於屬最親姦臣猶得誣以
極惡則踈遠小臣天下細民欲寘死地可望雪理
耶其不濁亂天下傾危宗社不已也蓋今諸王之
中臣序爲長周齊湘代岷五府已去獨臣未去臣

去則楚蜀秦晉諸國不難去矣寧王無罪此又削其護衛譬諸人身手足皆去身能全乎伏望陛下鑒臣愚誠思宗社大計斷然不惑去此姦慝臣某頓首頓首罪黜都指揮僉事周成袁成張睦皆降燕是月 成祖傳檄言我 父皇奉天承運華夷一統長子立爲皇太子餘子封王各守藩屏以爲子孫萬代計不幸 皇太子薨逝秦晉二王繼殞 父皇慈念皇太子遂立其次子爲皇太孫居東宮 洪武三十一年閏五月十日 父皇賓天皇太孫即帝位我諸王不敢以叔道尊元臣子之情至矣

盡矣帝年幼冲任用奸邪小人屏棄典刑殘害骨
肉天變屢見恬不修省此皆齊尚書黃大卿左班
文職等官讒佞于君恣行不道今天下但知有齊
尚書等不知有皇帝皇帝被奸臣惑溺 父皇陵
土未乾周代淵齊岷五王相繼竄流齊尚書等又
使惡少謝貴等爲北平都司官張昺爲布政司官
與本府長史葛誠合謀六月圍我王墻柵我王門
殺我守王城卒諸軍披甲執杖鉦鼓叫呼聲震城
野七月初旬且引兵入王城以都指揮張信言洩
其奸不得已起兵擒獲逆賊謝貴等七月十六日

擒朱忠殺都指揮孫忝俞瑱八月十六日破雄縣
擒都督潘忠楊松二十五日破真定走耿炳文擒
左副將軍駙馬李堅右副將軍審忠右都督顧成
河托都指揮劉燧江陰戍吳高都督耿獻揚文以
遼東兵圍永平余直抵永平高等夜遁還兵大寧
都指揮房寬來降殺朱鑑都督劉貞陳亨守松亭
關不肯來降余襲破其營擒亨貞單騎遁去大寧
遂平未幾齊尚書黃大卿等左班文職又矯詔曹
國公李景隆領兵五十餘萬十月十六日攻北平
圍城甚急余以寡敵衆景隆大敗斬首十萬九千

餘級景隆夜遁去余本 太祖高皇帝親子母

孝慈高皇后 皇太子親弟忝居諸王之長禮曰

父之仇不共戴天兄弟之仇不反兵今奸臣齊尚
書黃大卿等余必不與共戴天也故用 欽遵祖

訓統兵三十萬誅討左班文職奸臣傳檄天下藩

屏諸王暨官吏軍民咸使知朝廷左班文職奸臣

大逆不道我 父皇之仇爲子者義在必報也省

平夷衛十二月燕間遼東守將吳高削爵徙廣西

專命楊文守遼東庚申 成祖攻廣昌守將楊宗

以城降是月岷府典勝李英等伏誅薊州鎮撫曾

璿起兵攻北平不克死之駙馬都尉王竄謀叛幽
于其家某衛官張倫等率兩衛官軍南奔結盟報
國以練子寧爲吏部左侍郎茹瑺復爲兵部尚書
初令武官襲替兵部曾五府取旨是時掌中府事
駙馬都尉謝達署左府事孝陵衛指揮使黃鉞右
府都督僉事陳春掌前府事駙馬都尉耿璿掌後
府事駙馬都尉尹清省躬殿成殿在乾清坤寧二
宮間爲退朝燕息之所置古經聖訓其中以尚父
丹書之旨夏書聲色宮室之戒命孝孺爲銘以表
義爲右府都督僉事遷肅王楨於蘭縣選募謀勇

以中牟人楊木爲錦衣衛鎮撫沅州人周拱元爲
所鎮撫法司奏今歲論囚視往歲減十三畱守左
衛指揮同知李申伏誅籍其家叅贊大將軍軍務
高巍使燕署應天府事兵部郎中方賓謫戍廣東
以錢芹爲行軍署都事茅大芳副都御史葉砥翰
林編修顏伯瑋沛胡儼桐城梁潛陽春知縣

庚建文二年春正月丙寅朔天下官來朝免賀

成祖攻蔚州守將王忠李遠以城降省翁源縣入

英德初置後湖祗候所二月降漢陽府爲州丁酉

燕兵攻大同壬寅詔禮部尚書陳迪右侍郎黃觀

知貢舉翰林學士黃倫太常少卿商遜志充考試
官右拾遺朱逢吉史官吳勤葉惠仲趙友士徐旭
張秉彝同考試官御史七度俞吉士監試官降南
雄府爲州省保昌縣今蘇松江浙人得官戶部甲
子改都察院爲御史府革十二道置察院一詔曰
頃以治獄煩興易御史臺號都察院與刑部分理
庶獄今賴宗廟神靈斷獄頗簡其更都察院仍漢
制爲御史府專糾貪殘舉循良匡政事宣教化爲
職省御史員定爲二十八人務爲忠厚以底治平
改都御史景清爲御史大夫以監察御史戴德彝

爲左拾遺以黃觀爲禮部侍中掌尚寶司事是月
鞞鞞可汗坤帖木兒瓦剌王猛哥帖木兒款北平
景隆率兵出紫荆關援大同 成祖自居庸關還
北平景隆遺書 成祖請息兵王咨書索齊泰黃
子澄三月丙寅朔策試禮部貢士吳溥等一百一
十人制曰諸生蓋聞致治之主論治道之盛必以
唐虞二代爲準堯舜禹湯文武數聖人者其德厚
矣然所以本諸身發於政事施澤於民者其先後
始終亦可得而言歟夫由親以及疏篤近而舉遠
百王之所同也堯舜之時黎民於變時雍矣以親

則有象之傲臣則有共鯨之凶將聖人之化有所弗及歟抑爲惡之人有不得而化者歟朕紹承大統每思古先聖帝明王之治何稽何爲而可使家給人足比屋有可封之俗行何善政而可使囹圄空虛刑措不用歟圖治莫切於用賢而患賢才之難致化民莫先於教學而患禮樂之難興果何由而可使野無遺賢而民皆樂於爲善歟茲欲使海內皞皞熙熙如唐虞三代時致之必有其道施爲必有其序諸生習於聖賢之說久矣其具著于篇朕將親覽焉賜胡靖王良李賈等進士及第出身

有差以靖爲翰林修撰改詹事府爲御史府賜御
史大夫宴於新署又賜監察御史衣人一襲令禮
部乙榜舉人署教諭訓導事者給俸三年入禮部
試試中計所教人得中鄉試就進士出身資格遍
陞一級否從本級其下第而所教人中鄉試者與
實授九年通考稱職平常不稱職黜陟否仍署職
減俸十之五乙榜年未三十不願署教者聽省忻
城縣并入東蘭縣武臣犯法被黜者悉叛走降燕
燕盡復其故官夏四月景隆兵次德州郭英吳傑
等兵次真定約日合兵進攻北平先是上遣中官

賜景隆璽書及斧鉞渡江忽大風雷雨暴至舟破
盡沉諸江至是復賜景隆景隆益專恣紀律不嚴
號令煩數諸將易玩之辛丑 成祖率衆渡馬駒
橋南駐武清癸丑景隆軍至河間先鋒叅將平安
至白溝河郭英等自真定移營保定期會於白溝
河 成祖進至固安乙卯營中大雨平地水深二
尺已未 成祖率衆渡白溝河平安伏精兵萬騎
邀擊 成祖曰平安豎子往從吾出塞征胡識吾
用兵以故敢爲先鋒今日吾且破之使心膽俱喪
安驍勇善戰互有勝負俄都指揮何清陣動戰敗

被執安收兵還營景隆胡觀郭英吳傑等合兵六
十萬聯營白溝河藏火器一窠蜂揣馬丹地中人
馬遇之輒爛夜與燕兵大戰成祖從三騎殿後
迷失道下馬伏地視河流辨東西始知營在上流
倉卒渡河而北庚申成祖率衆渡河胡騎三百
叛降燕燕胡騎指揮省吉盡掩殺之是日景隆諸
軍進戰破成祖後軍房寬狼狽走成祖率衆
復戰驍將瞿能父子皆戰沒景隆麾諸騎兵乘敵
後成祖見張玉朱能丘福陣動急又見陣後塵
起曰敵繞出我後矣馳騎赴之戰甚力左右曰敵

衆我寡難與持久宜退就玉等併力景隆等呼噪
益進矢石俱發注如雨成祖馬三易三被創矢
三服並射盡乃持劍奮擊劍又缺折急走登隄佯
麾鞭若招後繼者景隆等疑有伏不敢上隄而
成祖復率衆馳入陣陣動會旋風折大將旗景隆
軍大亂成祖乘風縱火燔諸營郭英等潰而西
景隆潰而南委棄輜重器械孽玄雷萬萬計景隆重
書斧鉞盡爲燕所獲殺溺死者二十萬人成祖
復追至月樣橋降十萬餘人景隆單騎走德州壬
戌成祖遣人攻德州五月辛未景隆自德州奔

濟南癸酉燕將陳亨張信入德州奪軍餉百萬轉掠濟陽儒學教諭王省死之叅贊高巍叅政鐵鉉自臨邑入濟南丁丑成祖率衆趨濟南己卯景隆出兵合戰城下敗績奔入城成祖圍濟南攻之急鐵叅政高叅贊徐將軍盛統兵高僉憲宋叅軍張都統王太守王府校悉力防禦大挫燕衆辛巳成祖隄水灌濟南濟南人大懼鐵叅政曰無恐計且破之不三日遁矣令登陴人皆哭呼曰旦日且降盡輟守具出千人城外伏地請降又請退兵十里無驚動城中人成祖大喜是時成祖

在軍逾年往來戰守甚苦僅得永平保定及北平
三府諸府縣旋破旋堅守不肯降至是聞濟南降
日濟南中原要會得濟南斷南北即不下金陵畫
中原自守徐尚江淮遂下令退軍受降軍中大喜
呼萬歲鐵叅政懸鐵板城門上伏壯士圍堵中約
候 成祖入城呼千歲即下鐵板拔橋乃遣人請
成祖入撫諭 成祖乘肩輿張蓋率勁騎數人渡
橋直至城下城門開守堦者皆登城伏堵間 成
祖比入門門中人即呼千歲鐵板亟下傷成祖馬
首 成祖棄馬取從馬走走至橋橋下伏兵發斷

橋橋不可動 成祖得過橋復合兵圍濟南鐵叅
政令守陴者罵 成祖燕軍大怒攻益急鐵叅政
隨機應敵間出兵累敗燕兵是月都督僉事朱榮
棄 樂城遁還京誅之六月增改詹事府官置資
德院八百媳婦入貢遣監察御史周觀政監徐州
兵是月遣尚寶司丞李得成使燕議罷兵以儀賓
魯瑄褚富署都督僉事秋七月李得成還自濟南
下獄既而釋之平安率兵二十萬進次單家橋欲
分兵出御河奪燕餉舟復德州高燧出軍良鄉安
兵不敢進省沔縣入襄城八月戊申濟南圍解是

月盛庸兵至德州逐燕將陳旭自德州遁歸北平
承天門災詔求直言未幾乙字庫災改謹身殿爲
正心殿置學士一人羅華蓋文華武英殿文淵東
閣大學士各設學士一人改方孝孺爲文學博士
九月承天門成改爲臯門遂改午門爲端門端門
爲應門前門爲路門乙丑 成祖至北平冬十月
更定歷事監生選用法凡歷事一年爲滿考分三
等上者即授官次下者再歷一年復考考上者亦
即授官次量材選授下還國子監讀書省兩當縣
入徽州置威武中衛募健武克衛壯士兵部右侍

郎盧淵有罪除名清遠戍卒羅義上書下獄旣而
釋之詔諸將無使朕負殺叔父名是月平安與燕
兵戰華山斬燕將陳亨時安及吳傑駐定州盛庸
駐德州徐凱陶銘城滄州相爲犄角困北平滄州
城潰凱銘督士卒修城成祖佯出攻遼東至通
州循河而南渡直沽晝夜兼行至滄州城下列營
凱等始覺倉卒收築城具出戰敗績入城守成
祖攻破其東北凱及都督程暹都指揮趙濟胡原
李英張傑皆被執時降燕者數萬人北將譚淵
夜殺降卒三千人凱等皆降赴北平封盛庸歷城

侯以鐵鉉爲山東布政使帝以濟南完守賞鉉等
却敵功命翰林陳檢討賜銀幣吏部魯主事頒誥
命封三代尋陞鉉兵部尚書官軍姜貴等五十四
人以濟南功陞官有差召景隆還赦不誅以盛庸
爲平燕將軍克總兵官節制諸軍鐵鉉參贊軍務
十一月庸駐德州 成祖移直沽之舟至長蘆載
降獲輜重順流而北 成祖自率衆循河而南庸
出兵襲後不克 成祖遂至臨清移屯館陶掠大
名焚我軍餉十二月甲午 成祖至汶上掠濟寧
庸鉉率兵躡其後營於東昌先鋒將孫霖營滑口

燕將朱榮劉江襲破霖都指揮唐禮被執霖走乙
卯 成祖至東昌庸背城而陣燕擊其左翼不動
退而衝其中堅庸麾兵圍 成祖數重 成祖易
服奮躍馬出西南去燕軍爲火器所乘大敗庸兵
大呼噪奮擊殺燕大將張王丙辰復戰又敗燕軍
步卒先走庸乘之殺傷萬計北平震動 成祖退
駐館陶庸飛檄真定滄德諸將水陸犄角邀 成
祖歸路是月國子助教王紳卒是歲以徐實爲兵
部署右侍郎以陝西叅政劉季箎爲刑部左侍郎
湖廣叅議楊砥言事忤旨謫遼陽詔舉優通文學

之士以處士唐愚為翰林侍讀大理卿馬京坐事

謫 肅政按察司副使以鄒瑾為大理右寺丞

辛巳建文三年春正月辛酉朔凝命神寶成寶方一

尺六寸九分帝親定其文曰天命明德表正萬方

精一執中宇宙永昌先是帝在儲位嘗夢神人致

上帝命授以重寶元年使者還自西方得青玉於

雪山方踰二尺質理溫栗二年春正月帝郊祀宿

齋宮夕夢若有覩乃驚寤命玉人琢為大璽冬十

二月工成名凝命神寶至是以告天地祖宗為文

宣示遐邇百官稱賀大宴於奉天門頒賞四夷朝

使辛未大祀天地於南郊明日宴慶成群臣大歡
會賦詩詔成頒示天下歷城侯庸遣人來獻東昌
之捷詔諭天下丙子 成祖至北平丁丑享太廟
告捷二月乙巳 成祖復率衆南出己酉至保定
庸合諸軍二十萬駐德州約吳傑平安出真定攻
北平加禮部尚書陳迪太子少保大理左右少卿
汪善聞良輔坐事調河南湖廣肅政按察司副使
以鎮江知府薛嵩左補缺胡閏爲大理左右少卿
三月辛未庸兵至單家橋己卯營於夾河辛巳
成祖率衆至夾河庸結陣甚堅 成祖掠庸陣陣

旁火車火銃強弩戰盾固匝不能動。成祖退。出千騎追襲。成祖即率萬騎步兵半之直薄庸陣。庸陣堅不動。燕步卒攻左掖騎兵。擣中堅。庸始麾諸軍力戰。斬燕大將譚淵。成祖復以勁騎掩庸陣後。燕將朱能、張武等從。成祖合戰。庸軍火器不及發。戰者又中鐵積相牽。不能先後。遂却。都指揮莊得驍將楚智、皂旗張等皆陷陣。戰沒。是夕戰酣。迫暮。各斂兵入營。成祖以十餘騎逼庸營。野宿。明日引馬鳴角穿營而去。以上有詔旨無使。余負殺叔父名也。諸將相顧不敢發一矢。成祖

既還營復嚴陣約戰 成祖軍東北庸軍西南自
辰合戰至未兩軍相勝負屢退屢進將士皆疲各
坐息少頃復起戰相持不退忽東北風大起塵埃
漲天沙礫擊面庸軍中昏暗不辨咫尺燕兵大呼
乘風縱左右翼橫擊庸軍中大敗 成祖追奔至
滹沱河庸走還德州當是時庸恃東昌之捷輕敵
謂此舉必破北平將士咸携金銀釵器錦繡衣袍
曰破北平張筵痛飲至是盡爲燕兵所獲癸未真
定諸將率師駐單家橋甲申 成祖率兵徑趨橋
與平安等大戰安擒燕將薛祿祿脫走吳傑平安

初徵與庸合勢比出真定聞庸敗又聞燕散遣使
兒四出索餉遂進兵襲成祖降欽州爲縣省陽
山縣入連州葦鎮番衛是月罷兵部尚書泰太常
卿子澄以謝燕閏三月乙未燕兵掠真定吳傑移
軍滹沱河成祖令騎兵遏河上流步卒輜重從
下流渡遇傑兵不戰傑移營藁城成祖亦至藁
城戊戌合戰互有勝負己亥傑安列方陣西南燕
攻其東北成祖以驍騎循河出其軍後大戰傑
安發火器大弩射成祖下如雨矢集王旗如蠟
毛安陣間縛樓高數丈安登望燕兵見戰勝大喜

麾諸軍力戰。成祖見安登樓率精騎直趨攻樓
安見。成祖馳至急下樓墜而走。會大風發屋拔
樹。傑軍亦敗。都指揮鄧戩陳鵬等皆被執。安傑還
真定。己酉燕兵掠順德。辛亥掠廣平。癸丑掠大名。
是日貽書。成祖謫斥恭子澄。可罷兵不聽。上書
曰。臣聞虞舜用辟首去四凶。殷湯之聖不吝改過。
皆帝王之盛美。萬世所師法也。臣奉藩以來。今歷
二紀。粟粟不敢違越。皆緣姦臣齊恭。黃子澄懷莽
操之逆圖。志傾危於宗社。造滔天之禍。剪藩輔之
親。羣前諸主。次及於臣。誣直爲枉。飾虛爲實。加之

大惡冒以深誅發天下之兵殫府庫之財擠臣一
家並寘死地臣嘗瀝忠懇號號訴於天天且甚高
畧無見聽夫小杖則受大杖則走臣雖至愚豈忍
父子俱被無辜之戮而今陛下受枉殺親王之名
哉故以兵自防誠非得已上賴天地宗廟之靈鑒
臣忠誠憫臣非罪俯垂庇佑大軍之至毋自摧衄
然臣不敢爲喜恒用傷悼誠念此皆 皇考所養
兵民而姦臣一旦盡驅之白刃之下使濺血成川
曝骸蔽野嗚呼冤哉彼實何罪故夙夜拳拳秉誠
據敬籲天地籲祖考冀開發聖明助震威斷早戮

姦賊用除禍本庶幾以清朝廷以安宗社以全親族以息兵民而天下有太平之望比聞姦臣恭子澄皆以竄逐于外臣一家長幼皆欣喜舞抃有更生之慶謂陛下日月之明已宣雷霆之威已震朝廷可以遂清宗社可以綏安親族可望保全生靈可望休息天下可望大平帝舜之去四凶成湯之改過不吝陛下兼而有之然臣猶未能盡釋於心者初聞齊黃被黜即以徧告三軍將士曰明天子已洞察我之非辜而去權姦矣旦夕必下寬貸洗雪之恩吾與若等可以解甲而休帖席而卧矣將

士皆曰誠所願見但慮非出誠心而姦臣姑爲退
避之計以弭我耳然我豈可輒自弛以束手就擒
誠如其果出誠心則吳傑平安盛庸之衆當悉召
還而今猶聚境上侵迫不已則是姦臣之身雖出
而姦臣之計實行臣思其言恐亦人事之或然者
也夫聖人感人至誠而已至誠可孚豚魚而况人
乎陛下推誠待下誰不悅從若徒示以去姦臣之
名而實仍用姦臣之計此非獨欲撤陛下之藩籬
將遂傾陛下之堂室莽操之事前鑒甚明此不待
智者而後知也姦臣之計臣前書陳奏已詳如陛

下不信但試察其所行所言果忠於朝廷乎果其
自爲乎惟陛下明之於心度之於理參之於古驗
之於今力斷而行之無終爲憮邪所蔽天下幸甚
宗社幸甚非獨臣一家一國之幸也書至上召孝
孺視書對曰今諸軍大集燕兵久羈大名暑雨爲
疹不戰自罷急令遼東諸將入山海關攻永平真
定諸將渡蘆溝橋擣北平彼顧巢穴歸援我以大
軍躡其後必成擒矣我國欲緩之彼奏適至宜且
與報書往返逾月彼心解而衆離我謀定而勢合
上曰善立命孝孺草詔言罷兵遣大理少卿薛昂

持報燕又爲榜諭數千言刻印萬張授崑令至燕
軍中密散諸將士崑見成祖問上意云何崑曰
朝廷言殿下且釋甲暮即旋師成祖怒曰是紿
我也崑惶恐不能對燕將士譁欲殺崑崑戰慄流
汗伏地成祖令護崑南還翰林侍讀唐愚士卒
夏四月崑至自燕軍言燕軍強盛孝孺惡之曰此
爲燕遊說也五月吳傑平安盛庸出兵扼燕餉道
成祖遣其指揮武勝奉書於朝曰比荷聖明允臣
所奏特遣大理少卿薛崑下詔軍中諭以偃兵息
民雖臣將士不能無疑於權姦之欺臣之父子蓋

已欣戴陛下之仁矣而崑歸未十日吳傑平安盛庸顏疊發兵絕臣糧運要殺臣將校數百人臣將士守臣約束不敢赴鬪而彼必欲求釁略不見捨與比所下詔旨背馳誠有以中臣將士之所疑孤臣父子之所欣幸也如謂朝廷息兵之命傑等有
所不知不聞薛嵩之來往後皆經其軍中其可謂不知不聞耶此皆奸臣之所爲而陛下深居九重有所不知不聞也臣之所恃者陛下至尊至親也今爲姦臣所惡陛下雖有憐之之心而不能見庶則臣自救之計敢一日而忽哉臣之忠誠計薛嵩

歸必能詳達不但前日詔旨如此今日姦臣矯制如
彼外情洶洶不敢不聞伏惟擴明奮斷以固皇業
以安天下斯臣亦有保全之望臣無任戰兢俟命
之至上覽書曰燕王本 皇考孝康皇帝母弟於
朕爲叔父柰何必用兵爲也召諭意孝孺孝孺對
曰陛下即欲罷兵兵一散即難復聚彼或長驅犯
闕何以禦之今軍聲大振不日有捷書來聞願陛
下無惑甘言勝等縛下錦衣獄改利州直隸廣西
調刑部左侍郎王良爲浙江肅政按察使六月辛
酉 成祖遣李遠等南掠餉道壬申遠等至濟寧

又至沛縣焚餉舟萬艘河水盡熱魚鱉皆死漕卒
散走京師大震壬午都督袁宇率兵三萬邀擊遠
中伏敗績殺觀海衛指揮張壽壽飲中言國事危
急坐妖言論死遣太僕少卿祝孟獻使朝鮮市馬
秋七月己丑彰德守將都督趙清禦燕兵戰敗癸
巳燕兵破尾尖寨丁酉平安邀擊燕將劉江於平
村戊戌遣錦衣衛千戶張安遺燕世子書先是孝
孺門人林嘉猷嘗被成祖召至北平居邸中久
之知高煦及三郡王不睦於世子屢讒於父內臣
黃儼素奸險世子惡儼儼曲事三郡王三郡王與

世子守北平高煦從 成祖軍中時時傾世子孝

孺言於帝曰兵家貴間燕父子兄弟可間而離也

帝問云何孝孺言其故帝曰柰何間之孝孺曰世

子見疑必北歸而吾餉道通矣帝曰善立命孝孺

草書貽世子令歸朝且許王燕地世子得書不啓

封并安致 成祖所三郡王儼先已馳使告 成

祖世子且反 成祖疑之問高煦高煦曰世子故

與太孫善厚語未竟世子書至 成祖曰嗟乎幾

殺吾子壬寅大同守將都指揮房昭引兵入紫荆

關掠保定下邑駐易州西水寨約期進攻北平

成祖聞之即日還兵援保定限僧道田人五畝遂
勅禮部曰朕聞釋道之教其來久矣本以清淨空
幻爲宗超世離俗爲事近代以來俗僧鄙士貪著
自養殖貨富豪甚至田連阡陌本欲以財自奉然
利害相乘迷不知覺既有饒足之利必受官府之
擾况因此不能自守每罹刑憲非惟身遭慘辱而
教亦墮焉夫佛道本心陰翊王化其助弘多至於
末流所習本乖蠹蝕教門致使訕毀肆行貽累厥
初朕甚憫之原其害教之端實自田始今天下寺
庵宮觀除原無田產外其有田者每僧道一人各

存田五畝免其租稅以供香火之費餘田盡入官
有佃戶者佃者自承其業無佃戶者均給平民如
舊田不及今定數者不增若有以祖業及歷代撥
賜爲詞告言者勿理如原係本朝撥賜者不在此
例凡僧道一應丁役並免其有自相告訐爭訟非
干軍民者聽其本教衙門自治若致傷人命及干
軍民詞訟者仍聽有司受理其入有司理訟者不
許仍服僧道冠服洪武年間已有清理及開設教
門榜文當申明遵守教規化緣者不在禁限非奉
朝命不許私竊簪剃年未五十者不許爲尼及女

寇嗚呼多藏厚亡老氏攸戒除欲去累大覺所珍
利欲滅則善心生善人多則風俗美欽茲定制永
底太平定銓選法通類覆奏附選八月丁巳 成
祖渡滹沱河留其將孟善守保定丙子真定總兵
遣都指揮韋諒率兵餉饋援房昭丁丑 成祖圍
西水寨遣其別將朱榮圍定州是月老搃入貢放
還不識字人材及年未三十者改泗城州直隸廣
西九月甲辰 成祖攻定州省恭城縣降平樂府
爲州冬十月丙辰真定諸將都指揮花英鄭琦率
步騎二萬援西水寨 成祖自定州馳還英等列

陣義眉山下 成祖潛兵出陣後合戰敗績英琦
及都指揮王恭指揮詹忠等被執房昭韋諒走西
水寨遂破 成祖還北平是月翰林修撰王良卒
十一月遼東總兵官楊文圍永平燕將郭亮固守
不能克文出兵攻昌黎遇燕將劉江戰敗指揮王
雄等七十一人皆被執平安戰敗燕將李彬於楊
村鞞鞞通燕寇鐵嶺皇少子文圭生十二月丙寅
成祖復出北平置神武中錦川鎮淮衛勅駙馬都
尉梅殷鎮守淮安初置豐沛軍民指揮司詔禁內
臣出使侵陵吏民吏部試翰林史官楊士奇等以

次錄用復留士奇於翰林以程通爲遼府左長史
龔泰爲禮科都給事中是歲 太祖高皇帝實錄

成改程本立爲江西肅政按察副使以兵部武選
郎中古朴爲右侍郎起復陳洽爲文選郎中以徐
真馬溥爲左右府都督僉事充叅將率偏師北進

壬建文四年春正月德州裨將都指揮葛進率步

騎萬人爲先鋒渡滹沱河遇燕將李遠於藁城戰

敗平安率兵十萬復通州不克指揮賈榮等兵敗

于衡水 成祖攻破東阿戊戌遂破東平指揮詹

璟被執吏目鄭華死之燕攻汶上都指揮薛鵬被

執庚戌燕兵攻浦縣指揮王顯降燕知縣顏伯瑋
及主簿唐子清典史黃謙死之置四川英武前衛
是月晦 成祖至徐州二月諸軍皆營於濟寧餉
卒遇敵于鄒縣潰走甲戌 成祖攻徐州城中兵
出戰敗績改向武都康州直隸廣西省武林縣入
富勞更定勲階尚書爲特進資政上卿侍中資政
卿侍郎資政亞卿郎中資政中大夫員外郎贊政
大夫給事中嘉政中士始置京衛武學教授一人
啓忠等齎齋訓導二人三月甲申 成祖自徐州
進攻宿州平安統精兵四萬爲先鋒追躡 成祖

壬辰 成祖過河平安兵進至淝河遇伏戰敗胡
騎指揮火耳灰哈三帖木兒皆被執平安等兵駐
宿州燕將譚清斷徐州餉道燕兵攻破蕭縣知縣
鄭恕死之夏四月甲寅平安兵營於小河亘十餘
里張左右翼緣河而東遇 成祖騎兵合戰斬其
將陳文再戰又勝斬其將王真 成祖督戰急幾
爲安槊所及安馬蹶弗得前燕番將王麒躍馬入
陣援 成祖得脫裨將丁良朱彬被執是役也燕
軍中大懼議且還北平平安諸軍營小河南燕兵
據河北甲戌大戰齊眉山自午至酉會大霧斂兵

還營乙亥燕諸將欲還北平不敢顯言輒請退屯
小河東就麥觀隙而動 成祖不聽朱能鄭亨又
力言渡河非計諸將多不肯從 成祖曰欲渡河
者左不欲渡河者右諸將多趨左 成祖大怒曰
任汝所之諸將始不敢言何福引兵會平安燕軍
中益懼 成祖數日不解甲矣丁丑平安營於靈
壁 成祖遮其餉道何福等出壁來援敗績辛巳
大戰又敗績左右副總兵都督陳輝平安左右叅
將都督馬溥徐真都指揮孫成等三十七人內臣
四人禮部侍郎陳性善大理寺丞彭與明欽天監

副劉伯完指揮王貴等一百五十皆被執何福走吐蕃寇陷保寧所五月己丑成祖至泗州守將周景初降燕辛卯盛庸率馬步騎數萬戰艦數千列營淮南成祖營淮北燕將丘福朱能潛濟出庸後庸走盡棄其戰艦軍資成祖遂渡淮至盱眙諸將分屯鳳陽淮安以遏燕兵成祖欲從淮安取道渡江以駙馬都尉梅殷守禦嚴備恐攻之不克欲從靈壁出鳳陽渡淮知府徐安毀橋斂舟不得渡遂徑趨揚州庚子成祖至天長揚州指揮王禮千戶徐政張勝江都知縣張本執守將崇

剛監察御史王彬降燕 成祖遂至揚州高郵指
揮王傑降燕 成祖至儀真詔天下勤王曰燕
勢將犯闕中外臣民坐視予之困苦而不予救乎
凡文武吏士宜即日勤王共降大 宗社再安予
不敢忘報詔下京城內外臣民慟哭遣刑部侍郎
金 禮部侍中黃觀國子祭酒張顯宗翰林修撰
王叔英等分道徵兵入援召黃子澄還蘇州府知
府姚善寧波府知府王璉率師勸王遣慶成郡主
至 成祖所議割地罷兵不聽是月遼東兵潰於
直沽理問徐讓縣丞衛健使燕還以爲衛鎮無軍

前差遣勅刑部尚書侯太轉餉淮安燕兵掠鳳陽
種馬六月癸丑朔 成祖至浦子口諸將盛庸等
迎戰敗之 成祖欲且議和北還會高煦引胡騎
至大喜遽起披甲仗鉞見高煦撫其背令努力高
煦殊死戰諸軍小却上急遣都督僉事陳瑄率舟
師援庸瑄乃降燕乙卯 成祖遂渡江盛庸率海
艘出高資港嚴陣以待 成祖奮力先登大戰庸
敗走鎮江守將童俊降燕庚申 成祖營龍潭上
遣景隆都督王佐尚書如璫至龍潭再議割地罷
兵分遣諸王守京城諸城門景隆等見 成祖伏

地納款頭首稱臣呼萬歲不已王戊景隆等歸言
成祖必欲得齊恭黃子澄輩上令景隆等再往言
諸臣皆竄逐外郡俟縛至遣來景隆等惶懼不敢
行上令諸王與景隆等偕行 成祖曰勿多言不
得奸臣吾必不已諸王歸上會群臣慟哭或勸上
且幸浙或曰不若幸湖湘孝孺請堅守京城以待
四方之援議不決遣魏國公徐輝祖開國公常昇
分道出師禦戰甲子遣人齎蠟書四出促勤王兵
為燕遊騎所獲乙丑 成祖至金川門谷王穗開
門 成祖遂入城上手誅徐增壽於左順門又欲

誅景隆不果諸內臣諱言不如遜位去須臾宮中
火起傳言帝崩 成祖爲發喪治葬翰林文學博
士方孝孺等不屈死之夷其族 成祖即皇帝位
革除建文年仍稱洪武以故洪武有三十五年或
曰帝發火宮中即削髮爲僧入蜀或曰去蜀未幾
入滇南常往來廣西貴州諸寺中天順中出自滇
南呼寺僧曰我建文皇帝也寺僧大懼白官府迎
至藩堂南面跣足坐地自稱朱允炆曰胡濙名訪
張儼偏實爲我衆聞之悚然聞於朝乘傳之京師
有司皆以王禮見比至入居大內以壽終葬西山

不封不樹帝嘗賦詩曰牢落西南四十秋蕭蕭華
髮已盈頭乾坤有恨家何在江漢無情水自流長
樂宮中雲氣散朝元閣上雨聲收新蒲細柳年年
綠野老吞聲哭未休士庶至今猶能道之或曰帝
之生也頂顛頗偏高皇知其必不終嘗匣髮鑑
戒之曰必嬰大難乃發此以故遂爲僧去又曰建
文君幼秀穎能爲詩高皇使賦新月曰誰將玉
指甲抓破碧天痕影落江湖上蛟龍不敢吞帝曰
必免於難

論曰余好問先達建文時事皆爲余言建文君寬

仁慈厚少好文章禮樂不喜任律法操切人比即位得方孝孺專意行周官法度輒改高皇帝約束靖難兵起不爲意即有敗狀來聞亦輒謂直多發兵盪平在旬朔間耳諸大將統重兵北進者又多懷貳心以故成祖至江上不戰而潰余至建業聞之江上老人曰成祖乃天授建文君何尤建文君金陵詩曰是日乘輿看晚晴葱葱佳氣滿金陵禮樂再興龍虎地衣冠重整鳳凰城後至貴州金竺長官司羅永菴嘗題詩壁間其一曰風塵一夕忽南侵天命潛移四海心鳳返丹山紅日遠

龍歸滄海碧雲深紫微有象星還拱玉漏無聲水
自沉遙想禁城今夜月六宮猶望翠華臨其二曰
閱罷楞嚴磬懶敲笑看黃屋寄曇標南來瘴嶺千
層迥北望天門萬里遙歎段久忘飛鳳輦裝裝新
換袞龍袍百官此日知何處惟有群鳥早晚朝

皇明遜國記終

子履準校正